

距南郑五十里。少轩寄寓汉中府，故能得此碑。

初二日。先日大雨，夜半尤甚。是早雨住，大北风，寒甚。王升泽、高恭田自上海回，带到张寅宾信，并上海徐雨之、张叔和、郑陶斋信，寄示洋刻《图书集成》章程。又接陆存斋信，并寄所刻《皕宋楼藏书志目录》一百二十卷，收藏之富可知。李冠卿、凌问樵、王实丞、刘祝庭、王惠泉、张鹤臣、单仲允过谈。绍西亦自湖北归，述悉王荔村尚在料理饶智元已给刘祝庭、黄子寿等各票，其议论方长也。

初三日。接胡其祥、徐仁溪、龚瓶安、周昌辅、龙树棠、易桂生、聂仲芳各信。又接广东俞君文莱一信。亦致合肥伯相、曾沅浦宫保、徐雨之、张叔和、郑陶斋、黄咏清各信。周步瀛、陈葵心过谈。陈少轩见惠倪雲林山水画幅，辞不敢受。记云林自题一律：我爱陈君贤父子，能将舟楫寄芳村。三薰三沐爱敬客，能述能承慈孝门。水影云容归画笥，松醪秫酒泻陶尊。淹留竟日无尘杂，消受清风秋树根。后书戏为明远作，似云林宿陈明远宅，为之作画。诗亦有意致也。又记裴樾岑诵刘霞兄寄黄子寿云：才从江上送归鸿，又向天涯叹断蓬。万里乡心云栈北，十年人事海波东。鹃啼早悟时多故，麟出谁知道易穷。莫纵狂歌骇燕市，世间马耳过东风。

初四日。四日大北风不息，亦历来未有之奇也。接袁绶瑜信，并示黄少溪所著书四种，一曰《道德经大义》；一曰《论语析疑》；一曰《蘧斋问答》；一〔曰〕《读书指要》，意合孔、孟、释、老而并尊之，历诋汉、宋二家之学，其文非甚奇，而持论特创。瞿子玖、黄子寿、邓子柔、言舫丞、易淑子、严辅邦、李邦华、易叔辉过谈，遂尽一日之力。

初五日。卞诵臣中丞、钱子宣、曾荅臣过谈。亦往拜高抟九、